



GOVERNMENT OF MIZORAM

**BUDGET SPEECH
2015-2016**

MIZORAM LEGISLATIVE ASSEMBLY

a

**PU LALSAWTA
HON'BLE FINANCE MINISTER**

thusawi

Zirtawpni, October 9, 2015

KUM 2015-16 ATANA FINANCE MINISTER BUDGET SPEECH

Pu Speaker,

I remtihnain he House zahawm takah hian kum 2015-16 Financial Year atana Regular Budget hi sawihova, pass a nih theih nan ka rawn pharh e.

2. He House zahawm takah hian March 19, 2015 ah khan Vote on Account Budget April - July 2015 atan ka rawn pharh tawh a. July 7 ah khan Vote on Account dang August - October, 2015 chhung atan ka rawn pharh leh a. Heng Vote on Account Budget tum hnih he House zahawm takin min pawmpui avang khan lawmthu ka sawi a ni. Kan hriat theuh angin kumin 2015-16 hi Fourteenth Finance Commission recommendation anga State ten sum kan hmuh tan kum a ni a. He Fourteenth Finance Commission recommendation hian State kuta sum luh dan a thlak danglam nasa hle a. Chubakah Central Sorkarin kalphung thar siamin, Planning Commission a thiat a, a hmunah National Institute for Transforming India, NITI Aayog chu a din thar a. Hemi avang hian Five-Year Plan leh Annual Plan chhunga State ten Plan Fund kan hmuh thin Normal Central Assistance (NCA), Special Central Assistance (SCA) leh Special Plan Assistance (SPA) te hmuh a ni ta lova. Mizoram tiama State thenkhat Special Category State nihna pea duhsak bikna pek thin chu tihbo a ni ta bawh a. Hemi bakah hian Centrally Sponsored Schemes hrang hrang tana Central leh keini Special Category State ten pawisa kan thawh tur intumsem dan tlangpui awm sa 90:10 chu tihdanglam deuh vek a nih tur thu Central Sorkar

atanga hriat a ni bawk a. Heng thil hrang hrang avang hian a hmaa ka sawi tawh ang khan Vote on Account tum hnih lak a ni tih Member zahawm tak ten min hriatpui nawn leh turin ka ngen che u a ni.

3. Fourteenth Finance Commission recommendation hnuaiia kum 2015-16 atanga 2019-20 chhunga kan State sum hmuh tur zawng zawng hi a vaiin Rs.30584.21 crore a ni dawn a, chungte chu a hnuaiia tarlan ang hi a ni :

(Rupees in crore)

Year	PDRD Grant	Share of Taxes	Urban Local Bodies		SDRF	Total
			Basic	Performance		
2015-16	2139	2670	11.54	-	15	4835.54
2016-17	2294	3081	15.97	4.71	16	5411.68
2017-18	2446	3559	18.46	5.34	17	6045.80
2018-19	2588	4118	21.35	6.06	18	6751.41
2019-20	2716	4769	28.85	7.93	18	7539.78
Total	12183	18197	96.17	24.04	84	30584.21

4. Tichuan, he kum 5 chhunga kan State Sorkar sum hnar pui ber tur chu Share of Taxes leh Post-Devolution Revenue Deficit Grant (PDRD Grant) te hi an ni a. Urban Local Bodies leh Sate Disaster Response Fund (SDRF) atana kan hmuh turte khi chu thil danga hman theih loh an ni.

5. Fourteenth Finance Commission sum kan hmuh tur hi Thirteenth Finance Commission hnuaiia kan hmuh ai khan tam viau dawnin a lang a. Mahse, Member ten min hriatpui tura ka duh chu Thirteenth Finance Commision hnuaiia Plan Fund kan hmuh thin zawng zawngte kha kan hmuh dawn tawh loh bakah, Centrally Sponsored Scheme hrang hrang thawh nana

sum intumsem dan pangngai 90:10 chu 50:50 emawa tihdanglam anih dawn tak avangin Centrally Sponsored Schemes thawh nana Matching Share atan sum tam zawk fe kan sen a ngai dawn ta a ni.

6. Tun hma zawng kha chuan Planning Commission-in Plan Fund kan mamawh tur hi Five-Year Plan chhungah kum tin Annual Plan Outlay min siamsak thin a. Tin, Central Finance Commission-in kum 5 chhung atana Non-Plan pawisa kan mamawh tur a ruahman angin Central Sorkarin min pe thin bawk a. Kumin 2015-16 atang hi chuan Plan leh Non-Plan Fund pawh thliar hranna awm tawh chuang lovin, Fourteenth Finance Commission pawisa hi State kutah rawn chhun luh a ni ta a ni. Heng bak Central Sorkar atanga sum kan hmuh tur dangte chu CSS, NEC leh NLCPR hnuaia Scheme hrang hrang thawhna turte an ni mai a. Heng Scheme hrang hrang atana pawisa hmuh tur zat hi chu Central Sorkar hnuaia Ministry ten an la ti chiang thei lova, he Budget ah pawh hian hmuh beisei zat rin thua dah mai rih a ni.

Budget Estimates 2015-16

7. Pu Speaker, tunah chuan kum 2015-16 Budget Estimates lo thlir ila.

Revenue Receipt

8. Revenue Receipt hian Tax Revenue leh Non-Tax Revenue Receipt te a huam a. Kum 2015-16 chhunga Tax Revenue hmuh beisei zat chu State's

Own Tax Revenue Rs. 326.56 crore leh Share of Central Taxes Rs. 2413.72 crore niin avaiin Rs. 2740.28 crore a ni.

9. Non-Tax Revenue hmuh beisei zat chu avaiin Rs. 4435.17 crore a ni a. Chumi atang chuan State's Own Non-Tax Revenue hmuh beisei zat chu Rs. 252.81 crore leh Central Sorkar atanga Grants-in-Aid hmuh tur Rs. 4182.36 crore a ni. Central Sorkar atanga Grants-in-Aid hmuh tur zawng zawng atang hian Non-Plan Grants chu Rs. 2167.54 crore a ni a. Plan Grants zawng zawng chu Rs. 2014.82 crore a ni.

10. Tax Revenue hmuh tur zawng zawng atanga kan State-in Tax Revenue kan hmuh ve theih zat tur chu Rs. 326.56 crore a ni a, chu chu 11.92 percent a ni a. Non-Tax Revenue kan State hmuh tur zat Rs. 252.81 crore chu Non-Tax Revenue kan hmuh tur zawng zawng atanga 5.7 percent a ni.

Capital Receipt

11. Kum 2015-16 chhunga Capital Receipt hmuh beisei zat chu Rs. 429.89 crore a ni a. Capital Receipt hi Sorkar-in hmasawwna atana sum a puk leh Sorkar-in Loans & Advances a lo pek chhuah tawh rulh let lehna a hmuhte an ni a. Non-Debt Receipt (Loan & Advances rulh let lehna) hmuh beisei zat chu Rs. 40 crore a ni. Internal Debt (Financial Institution hrang hrang atanga State Sorkar-in sum a puk) zat tura beisei chu Rs. 369.22 crore a ni a.

Central Sorkar atanga Loan lak tur chu Rs. 20.67 crore a ni. Tichuan, Sorkar sum puk (Pubic Debt) zawng zawng zat chu Rs. 389.89 crore a ni.

12. Central Sorkar atanga Share of Taxes hmuh beisei zat Rs. 2413.72 crore hi Union Budget mila dah a ni a. Fourteenth Finance Commission-in recommendation a siam zat chu Rs. 2670 crore a ni. Financial Year tawpa Central Sorkar-in a taka chhiah a hmuh dan a zirin Share of Taxes hi chu kan hmu tamin kan hmu tlem thei a ni.

State Tax leh Non-Tax tihpunna

13. Keimahni Tax thawhchhuah veah hian a theih chin china kan sum hmuhte tipung tura tan lak a ngai reng a, chumi atan chuan Sorkar pawhin sum hnar awm thei apiang a dap reng a ni. Nikum 2014-15 chhung khan State Excise atanga sum hmuh zat chu Rs. 4.91 crore a ni a. Mizoram Liquor (Control & Prohibition) Act, 2014 hman a lo nih takah hian kumin 2015-16 chhung hian State Excise atanga sum hmuh tur hi a pun beisei a ni, chuvangin State Excise atanga sum hmuh turin Rs. 35.68 crore ka ruahman a ni.

14. Tun hnaiah Sorkar-in Tobacco Products chi hrang hrang cigarettes, cigars, cigarittos leh *vaihlo* atangin rate dinglai 20 percent atangin 30 percent VAT lak turin thutlukna a siam a. Hemi atang hian kumin chhungin chhiah thar Rs. 1.50 crore hmuh belh beisei a ni.

15. Mizoram Entry Tax Draft Bill, 2015 he House-a pass tawh chu bawhzui mek zel a ni bawk a. Hemi atang hian chhiah thar engemaw zat hmuh belh beisei a ni bawk.

16. Mizoram (Land Revenue) Act, 2013 leh he dan hnuaiia Rules awm sa chu siamthaa tihdanglam tum mek a ni a. Ram leilung survey te, ram pek dan leh tehfel dan te, land record management leh land revenue assessment leh collection lamte enfel tum mek a ni a. Chung hnate chu kumin 2015-16 chhunga peih hman tum a ni a, heta tang hian chhiah Rs. 1 crore hmuh belh ka beisei a ni.

17. Land Revenue & Settlement Department hmalakna hnuaiiah Registration Fee leh Stamp Duty atanga chhiah lak tihpun dan tur kawng zawn mek a ni a. The Registration Act, 1908 hnuaiiah Mizoram Registration Rules, 2015 chu buatsaih mek a ni a. Heta tang hian kumin chhungin chhiah Rs. 5 crore hmuh belh tura ruahman a ni.

18. Chhiah ni lo sum hmuhna dang (State's Own Non-Tax Revenue) lamah hian tan lak a ngai hle bawk. A bik takin tui leh power hman mante hi wawi leh khata a rate tisang thut lova, kum tin a awm tawka tihsan zel a tul hle. Hemiah hian Department hrang hrangte pawhin hma an la mek zel a ni. Power hman man enthat leh bithliah hi Joint Electricity Regulatory Commission (JERC) for Manipur and Mizoram-in Multi-year Tariff Regulations, 2014 tlawhchhanin kum tin ruahmanna a siam thin a. Tuna Mizorama Power Tariff hi

North Eastern States dangte aiin a hniam bik hle a. Chuvangin, kan sum thawh chhuah a lo pun zel theih nan NE State dangte tluk emawa Power hman man hi kan tihsan ve hi thil tul a ni.

Expenditure

19. Consolidated Fund hnuiaia pawisa kum 2015-16 chhunga hmanral tur zawng zawng zat chu Rs. 7756.83 crore a ni a, heta tang hian Gross Revenue Expenditure chu Rs. 6093.29 crore a ni a. Gross Capital Expenditure zat tur chu Rs. 1663.54 crore a ni. Stock Suspense Head-a pawisa hmuh let tur paih hnuah Consolidated Fund hnuiaia sum hman tur zawng zawng zat chu Rs. 7576.56 crore a ni a. Hemi chhunga Net Revenue Expenditure zat chu Rs. 6091.29 crore a ni a. Net Capital Expenditure zat chu Rs. 1485.27 crore a ni.

20. Kum 2015-16 chhunga sum hman tur zawng zawng atang hian Non-Plan Expenditure pum pui zat chu Rs. 4519.96 crore a ni a. Plan hnuiaia sum hman tur zawng zawng zat chu Rs. 3097.78 crore a ni a. Heng bakah hian Centrally Sponsored Scheme hrang hrang tenawi ho, Plan chhunga rinluh loh thawhna sum hman tur ruahman zat chu Rs. 139.08 crore a ni.

21. Kum 2015-16 atana Plan Outlay zat Rs. 3097.78 crore hian Central atanga CSS/NEC/NLCPR atana sum hmuh beisei Rs. 1873.71 crore a huam a, a bak zawng Rs. 1224.07 crore hi State Sorkar sum bik Plan Sector atana hman tur a ni a, hei hian Financial Institution hrang hrang NABARD, NCDC, PFC leh

Central Sorkar atanga Loan kan lak tur te, Externally Aided Project (EAP) atana sum kan dawn turte a huam a ni.

State Plan Fund hmanna

22. State Plan Fund hi Plan hnuiaia hlawh leh inrelbawlna atana mamawh (Revenue Expenditure) te, Grants-in-Aid (Salaries & Non-Salaries) te, State Flagship Programme NLUP leh State Matching Share (SMS) atana hman tur a ni. State Matching Share atana mamawh tur zat hi Sharing Pattern tihdanglam a nih dawn avangin hriatchian theih a la ni lo na a, CSS/NEC/NLCPR Scheme kal mek leh lo la kal turte a khaihlak loh nan kum 2015-16 chhunga hman tur Rs. 111.40 crore dah chhin phawt a ni.

23. NLUP atan hian Rs. 60 crore ruahman a ni a. Hei hi hmalak la hmabak pawimawh zual atana ruahman a ni.

24. Soil & Water Conservation Department hnuiaia Rubber Plantation atan Rs. 3.61 crore dah a ni.

25. Animal Husbandry & Veterinary Department ah hian Rs. 3.47 crore chu Animal Feed Plant, Ramrikawn ami Project kal mek atan dah a ni a, Rs. 3.12 crore chu hna thar Integrated Veterinary & Animal Husbandry Training Institute, Lungpuizawl, Lunglei atan dah a ni.

26. Minor Irrigation Department hnuaiia Irrigation Scheme thar 11(sawmpakhat) thawh nan Rs. 4.90 crore dah a ni bawk.
27. Public Works Department hnuaiiah hnathawh mek Rehabilitation of West Phaileng-Marpara Road atan Rs. 3 crore dah a ni a; hna thar hrang hrang Chuhvel-Sihtlang Road te, R.Tuichang-Tumtukawn te, Zote-Chhipphir Road te, Zawngin-Suangpuilawn Road leh Laki-Vahai Road atan te Rs. 9.87 crore dah a ni bawk.
28. Food, Civil Supplies & Consumer Affairs Department hnuaiia hna kal mek Godown hrang hrang 27 (sawmhnih pasarih) sakna tur Rs. 27.59 crore dah a ni.
29. Public Health Engineering Department hnuaiia Water Supply Scheme (WSS) thar hrang hrang Kelkang WSS te, Lamchhip WSS te, Khawruhlian WSS te, Buangpui Solar Water Pumping System te, Tuikum leh Greater Serchhip WSS Booster Pump House leh Renovation of Ngopa WSS thawh nan Rs. 14.44 crore dah a ni.
30. Cooperation Department hnuaiiah Cooperative Societies hrang hrangte dawmkanna tur Integrated Cooperative Development Project (ICDP) kum 4 chhunga tihpuitlin tur ruahman a ni a. Hemi atan hian kumin 2015-16 hian Rs. 11.34 crore dah a ni.

31. Power & Electricity Department hnuiaia Project kal mek Ministry of Power-in a sanction tawh, Restructured Accelerated Power Development and Reforms Programme (R-APDRP) atan kan State tum ve tur 10 percent State Matching Share atan Rs. 24.05 crore ka ruahman a. He Project hi Mizoram khaw hrang hrang 9 tana Power distribution system tihchangtlunna tur a ni.

32. Public Works Department hnuiaia EAP Project Champhai-Zokhawthar Road leh Chhumkhum-Chawngte Road thawhna turin Rs. 114.70 crore ka dah bawk.

33. UD&PA Department hnuiaia EAP Project kal mek North-Eastern Region Urban Development Programme (NERUDP) chhunga Aizawl Water Supply leh Sewerage & Sanitation Programme thawh nan Rs. 57.87 crore dah a ni.

34. Finance Department hmalakna pakhat Mizoram Public Resource Management Programme (MPRMP) hnuiaia PSE Reforms & Restructuring atana Rs. 34.10 crore dah a ni.

35. UD&PA Department-ah Zodin Square-a Motor Parking lian sak theihna tur hmun lei nan Rs. 10 crore dah a ni bawk.

36. MLA Local Area Development Fund atan Rs. 20 crore ruahman a ni a. Heta tang hian MLA tinin Rs. 1 lakh theuh thawhin Mizoram State AIDS

Control Society tan Rs. 40 lakh chhun khawm a ni a. Hei hi Health Services Department ah Grants-in-Aid anga he Society hnena pek turin dah a ni bawk.

Plan Sectoral Allocation

37. Plan Outlay Rs. 3097.78 crore hi a hnuai tarlan ang hian Sector hrang hrangah sem a ni:

i)	Agriculture & Allied Services	– Rs. 318.61 crore
ii)	Rural Development	– Rs. 292.45 crore
iii)	Special Area Programme	– Rs. 97.38 crore
iv)	Irrigation & Flood Control	– Rs. 91.97 crore
v)	Energy	– Rs. 76.36 crore
vi)	Industry	– Rs. 27.17 crore
vii)	Transport	– Rs. 258.54 crore
viii)	Communication	– Rs. 15.50 crore
ix)	Science, Technology & Environment	– Rs. 3.09 crore
x)	General Economic Services	– Rs. 496.36 crore
xi)	Social Services	– Rs.1347.59 crore
xii)	General Services	– Rs. 72.76 crore

Non-Plan Service-wise Allocation

38. Non-Plan Fund hman tura ruahman zawng zawng Rs. 4519.96 crore chu Service hrang hranga hman dan tur hetiang hian ruahman a ni :

(a) Revenue Account

(i)	General Services	– Rs. 2190.26 crore
(ii)	Social Services	– Rs. 988.78 crore
(iii)	Economic Services	– Rs. 733.34 crore

(b) Capital Account

(i)	General Services	– Rs. 142.03 crore
(ii)	Economic Services	– Rs. 178.26 crore

<i>(c) Public Debt and Loans & Advances</i>	– Rs. 287.29 crore
---	--------------------

Budgetary Borrowings

39. Pu Speaker, keini State ang mahnia thawhchhuah pawisa tih tham nei lo tan chuan hmasawna hna pawimawh zual thawh nan sum puk a tul thin a. Mahse, sum puk hi fimkhur taka kalpui kan duh avang leh leiba pung zel tur ven a ngaih thin bawh avangin duh zat zat puk a theih lova. Hmanna tur awmze nei taka ruahman sa neih a tul a. Tin, Central Sorkar hian kan sum puk theih zat tur min bithliah sak vek thin avangin chumi anga kal chu a ngai thin a ni.

40. Kumin 2015-16 chhung hian sum kan puk theih zat chu Rs. 426 crore ah bithliah a ni a. Hei hi kumin chhunga kan State GSDP ni tura beisei Rs. 14204 crore atanga 3 percent a ni.

41. He Budget atana sum puk theih zat bithliah hnuaiah hian hmasawna hna hrang hrang thawh nan Market Loans te, Negotiated Loans hrang hrang NABARD, PFC leh NCDC atang te, EAP Projects thawh nana Central Sorkar kaltlanga Block Loan te kan la dawn a ni. Heng bakah hian Public Account hnuaia Small Savings, General Provident Fund, etc. leh Civil Deposits, etc. hnuaia sum balance tlingkhawmte hi kan State sum puk chhutnaah chhiar tel a ni bawh thin. Tichuan, a chungsa sawi Internal Debt leh Loans & Advances lak tur zat ka ruahman chu Rs. 389.89 crore a ni.

Sorkar leiba chungchang

42. Sorkar leiba san leh san loh tehna ber chu GSDP a ni a. Member zahawm takte hriat atan kan State leiba dinhmun tlangpui leh Thirteenth Finance Commission-in kum 2010-15 chhunga kan State leiba neih theih zat tur leh tlin tawk tura min beisei zat leh a taka kan dinhmun a hnuaiiah hian tarlan a ni :

Financial Year	TFC's recommended percentage	Liabilities in crore of rupees	Actuals as percentage of GSDP
2010-11 (Actuals)	87.3%	4496.86	74.23%
2011-12 (Actuals)	85.7%	4548.45	65.06%
2012-13 (Actuals)	82.9%	5114.20	63.51%
2013-14 (Actuals)	79.2%	5608.47	54.47%
2014-15 (RE)	74.8%	5863.71	46.91%

43. Kumin 2015-16 chhunga kan leiba neih zat tur ruahman chhin chu Rs. 6260.20 crore a ni a; hei hi estimated GSDP Rs. 14204 crore atanga 44.07 percent a ni.

Revenue Surplus leh Fiscal Deficit

44. Pu Speaker, Fourteenth Finance Commission chuan State te hi kum 5 lo awm tur chung (2015-16 to 2019-20) hian Revenue Surplus nei tur leh Fiscal Deficit GSDP atanga teha 3 percent aia sang lo nei turin min beisei a. He sum leh pai hmuh leh hman kawnga inkaihhraina (Fiscal Parameters) dungzuia kal hram hram hi kan tum dawn a. He Budget Estimates ah pawh hian

Revenue Surplus Rs. 1084.16 crore nei tur leh Fiscal Deficit Rs. 109.63 crore (chu chu GSDP atanga 0.77 percent) nei turin ruahmanna ka siam a ni.

Sum Inrenchemna

45. Pu Speaker, ka sawi tawh ang khan, kumin 2015-16 atang hi chuan Finance Commission pawisa tih loh Plan leh Non-Plan atana kan mamawh phuhrukna tur sum hmuh kan nei hran tawh dawn lova. Chuvang chuan kan Tax leh Non-Tax Revenue te hi theih tawpa tihpunna kawng dap a, kan neih chhun ang ang hi renchem thiam taka hman a ngai dawn a ni. Kan Chief Minister zahawm tak thahnemngaihna avangin nikum December thla khan Department zawng zawng leh State Sorkar hnuaiia Autonomous Bodies te zawm tur, inrenchemna leh sum hmuhbelh dan tur atana thuchhuah (Office Memorandum) CMO atangin siam a ni a. Hemi hma nikum July thla khan Finance Department atangin inrenchemna thu tho ka lo chhuah tawh bawk a. Heng Sorkar sum inrenchemna leh sum thawhchhuah belh theihna tur kaihhruaina hi tha thlah lova bawhzui zel kan tum a ni.

46. Hemi kawngah hian Sorkar chuan theih tawpin hma a la zel a. Mipui tana a nawlpuaia buhfai man tlawma leitir dan pawh ennawnin, buhfai kilogram khat Rs. 9.50 a hralh thin chu Rs. 15 ah tihsan a ni ta a. Kan State Public Sector Enterprises te dinhmun zirchiangin kumin kum tir lamah khan Sorkar chuan thutlukna lian tak a siam bawk a. Chumi ang chuan ZENICS, ZOHANDCO leh MAMCO te chu khar tur leh ZIDCO leh MIFCO te chu

siamthat leh mimal kuta hlan tura tih an ni. Hemi atan hian heng PSE hnuaia hnathawk nghet te tan Mizoram State Public Sector Enterprises (Early Retirement) Rules, 2015 duan fel a ni tawh a. Kumin 2015-16 chhung ngei hian Sorkar thutlukna hi hlenchhuah fel hman tum a ni.

State Finance Commission Report

47. Pu Speaker, kan Sorkar hian kan State chhunga Autonomous District Councils leh Local Bodies te tana sum pek dan tur duanga ruahmanna siam turin State Finance Commission hmasa ber chu a din a. An Report hi Sorkar-ah ni 19.2.2015 khan an thehlut a. He Report hi zirchian mek a ni a, Sorkar-in a pawm chuan Autonomous District Council pathum te, Aizawl Municipal Council leh Village Council te hnena State Sorkar-in sum a pek thin dan hi rual khai leh behchhan fel tak neia kalpui theih a ni tawh dawn a ni.

Tlangkawmna

48. Pu Speaker, kumin Financial Year 2015-16 hi *Insawhnghehna Kum* (Year of Consolidation) anga kalpui hi kan Sorkar tum dan a ni a. Chu chuan a kawh ber chu Sorkar sum leh pai dinhmun sawhngheh hmasak a, sum neih ang ang hian hma thar nasa tak la vak lova, hna pawimawh zual leh tul hmasa bitum a, kan leiba neihte a theih chin china sutkian phawt a ni. Kum tam tak atanga lo inchhek khawl tawh Civil Deposits tam tak kan neih mek hi kumin atang hian sum awm thei apiang sawkkhawmin kum thum kum li vel chhunga chinfel vek theih beisei a ni. Chutih lai chuan, Sorkar inrelbawlna leh a hmanruate tha

zawka enkawl a nih zel theih nan kan Sorkar chuan Non-Plan sum a neih chhun awm ang ang atangin sum mamawh dan fimkhur taka enchiangin a ngaihtuah zel ang tih ka tiam bawk a ni.

49. Kumin atanga kum 5 chhung atana kan State sum neih zat tur tlangpui hi chu a hriat theih vek avangin, kan neih chhun renchem leh hlawk thei ang bera kan State hmasawna tura hman hi he Sorkar hian a tum ber a ni zel dawn a. He hna tha tak leh khirh tak tur si hlen chhuak thei tur hian he House zahawm taka Member zawnzawngte leh Mizoram mipui zawnzawngte tanpuina ka ngen a ni.

50. Pu Speaker, Member zahawm tak ten i kaihhruaina hnuaia heng ka thusawite dawhthei taka min ngaihthlaksak avang hian lawmthu ka sawi a, he House zahawm takah hian kum 2015-16 Budget Estimates chu min pawmsak turin karawn pharh e.

Ka lawm e.